

胡文忠公遺集

胡文忠公遺集卷六十七

長沙鄭敦諱

編輯

湘鄉曾國荃

復余會亭

己未十一月十一日

逆水之賊聞風遁走小股非大股怯賊非悍賊戰事
尙須審慎賊之爭天堂者方未有已也務祈勤探確
探遠探并預先酌量情形迅速稟報軍火要件運至
來榜河不如卽運至天堂尤爲取攜甚便已函告沈
伍兩委員矣

復翁祖庚中丞

十三日

所論賊趨定遠麾下握定自守之策而相機圖之大
是穩著勝旣走而推袁軍聲較爲聯絡不失四路截
餉已是可慰然屢挫之後新舊相閒之時整理亦非
易易其建議請滌帥繞出蒙亳防賊北趨滌帥不願
來川原平曠徒恃短兵相接實非利器欲以南人而
習騎戰卽遲之二三年亦懼不能得力此事滌帥未
必能任之且 聖心亦必另有權衡也滌帥現駐
黃梅計由太湖進規安慶以多都護鮑鎮唐道蔣道
各軍圍剿甚緊并不欲掩其前此血戰之勞欲與相
機策應用心良苦林翼以月之五日移駐皖邊之界

牌石扼潛太英霍四路之要而以余參將一軍深入舒潛桐交界之天堂刺賊援要害而壘日來屢有戰事天堂爲賊所必爭之地卽爲我軍繼進舒桐所萬不可棄置之區前陳逆自江浦走告潛城葉逆僞報諂諂注重於此竊慮潛太未能速下該大股上竄而英霍境地防不勝防六安光化固始之閒已爲鞭長莫及來書謂廬州三河均有可乘之機尙暫存而不論希庵假歸未到其部下尙在蘄春新調西丹爲豫州借畱來鄂猶後英山張八嘴一帶祇會事恆七營兵分力單時深焦急耳

致曾滌帥三首 十五日

麾下移駐宿松足寒賊膽不分兵以待變而急起以
應之自是勝算太湖爲城賊所牽綴林翼爲天堂所
牽綴葉介唐十三日來稟賊已四路紛乘余丁尙無
告急之信未知力量何如此處有失則英蘄處處皆
警尊意以金逸亭九營調赴張家塆已札行矣德意
甚深微惟石頭嘴又嫌遠耳鮑之本生父母久故臨
大敵而請退人或笑之矣多以勢均權分再三爲告
而實亦苦調度不靈也如何補救以免危機實苦無
策之純恐異日難於合併蓋爲城賊所牽綴不能自

由且恐賊由潛山山內山外橫截太湖之後希庵未
到林翼不能進兵而英霍之間必有一路二路羣我
兵勢太湖兵力應專打援賊卽放走城賊亦甚無妨
援賊破則所得不止太湖援賊得遲則卽得太湖猶
獲石田也乞鈞函告之蔣唐鮑爲荷多料賊情其機
智過人顧全大局委婉以救天下之命皆我輩事也
一切機宜求丈指示卽兵尙擬撥援乞緩期赴調
丈駐宿松不分兵是得體要合機宜卽不必再有疑
慮惟援賊大股將至應商要事具陳於後 一事權
不一兵家所忌七年八年以前多鮑有都公主之故

能戰今年鮑已實爲總兵多已實爲副都統一請省
親一言傷發情狀不和已可想見古來將帥不和事
權不一以眾致敗者不僅九節度相州一役林翼曾
奏言兵事喜一而惡二三江忠烈曾奏以兵事少用
提鎮多禮堂之爲人意忌情深忮心尤勝然臨陣機
智過人且是 天子之使以副都統奉 旨總

統前敵再因以權分勢均爲言不可不專臚委任將
鮑唐總歸其節制調遣否則太潮今年之兵事必有
決裂不可收拾之狀克已以待人屈我以伸人惟林
翼當爲其難爲其難非如此則事必不濟如因此而

飽請退則畱其兵與多 一太湖之兵不爲不多然
爲城賊所牽綴雖多猶寡也有牽綴之勢與特立獨
行四無牽顧之勢大不相同設援賊乘我官軍有內
外受敵之勢耳石逆專伺寶慶兵力非不多也而竟
爲希庵所被鄙見以爲注重援賊爲上策 一多禮
堂料賊勢不從太湖正面而來必循潛山山僻而來
乘我之虛兵機似爲不謬 一希庵之爲人別是天
地間一種剛烈性情世人以官派處之必誤以富貴
功名人視之則視若腐鼠林翼誠求之或尙念我苦
心 一賊步步爲營以禦馬陸之衝突其必循山徑

僻處亦爲此若特其壘成二三日便無法可擊應請
函囑鮑唐爲是 一林翼處只贖三營屢蒙垂念已
遵奉盛意調逸亭暫來逸亭屢言力單非合併之純
則難言戰而天堂九營及石頭嘴七營孤懸心以爲
危如之純會合乃妙也然亦必俟賊情畢露乃可言
戰以上敬乞鈞度裁示明以教之

十六日專函奉請指示據各路官紳士民延訪之詞
賊勢若趨安慶不足畏若從小池驛循潛山之羅溪
河王家牌樓高橫嶺一帶則負山爲險爲潛山天堂
之東南爲太湖之西北中間百餘里此路便塞異日

進兵爲難太湖之兵腹背受敵天堂之兵亦難得力
日前多禮堂言宜爭小池驛卽爲此也此百餘里之
中如何彌縫不失之法敬乞籌度教示又賊必分三
路而來一小池驛一天堂一英霍也據林翼之愚見
小池驛應聽多自籌畫而賊之來路如何俟有確信
林翼須駐柳林河也又烏向不和致誤永安鄭秦不
和致誤桐城今日之事以申多抑鮑唐爲上策乞決
定示之此天下安危大計林翼非僅屈己以申人也

致官揆帥 十六日

自拔營後結營山頂風寒中人因念年未五十而氣

體如八九十人殊爲可慮十六日奉十二日手諭敬承一切應復者先列於右應商者續列於後敬祈酌定一天心欲楚派兵援淮北自應敬遵弟昔年卽創爲此議昨午橋書亦未決絕辭復應於唐鮑等軍內酌籌惟援賊號稱十餘萬實亦六七萬分股上犯此時淮北已輕必難卽籌耳如應復奏亦須以援賊上犯實情入告請告之蕙生作一復奏一松子關兩路口爲後路門戶如太空虛必有他變弟前札趙克彰李續燾紫兩路口而松關尤重應請改命趙克彰李續燾移駐松子關之五斗坳此二人滌帥

所惡不必撥去爲安一弟分九營入天堂分七營抵石頭嘴弟身邊只贖三營無可抽撥以替換義渠一翁祖庚一萬兩足見仁懷義氣天下之事皆能如此何患不濟一馬隊馬匹所籌撥者極是弟無異議一狗逆上犯必分三枝必有二假枝一真枝弟固無回黃州之理深入尙未能也一多禮堂屢言無權然札飭總兵道員概歸節制調遣亦頗未嘗多勇而收鮑勇而懷唐固中才耳無可無不可沈思苦想軍事以一事權爲第一要義唐代九節度之師潰於相州可爲殷鑒應於日內設法補救一多與醜不甚相得滌

與多亦不甚恰一太湖萬七千人馬隊在外滌軍在外兵力不爲不厚然爲賊賊所牽綴賊若至成敗利鈍未可逆覩私心日夜憂之心以爲危力莫能助此實情也一弟當英霍一路以天堂之深入頗嫌孤懸其餘應籌應議之處日不暇給亦實無一分把握也一舒六應飭挑足新舊馬隊一千名滌帥處僅交二百名亦可舒處須稍多乃足用也挑定後速請札飭駐紮蘄水英山交界之大岷河或英山城外亦可切速切速一浙餉澹村願解而旨意不準應請再奏擬稿較滌帥原稿爲妥仍請酌定速發遲則明春

餉項不支矣一兩路口松子關尙恐兵單弟當另籌以彌縫之

致多鮑唐蔣四帥 十七日

此次大股上犯挾全力而來破滅此股援賊則安慶舒桐廬州均可不攻自下以賊目只四眼狗一人其餘均不足數也如待其逼近步步築壘則是棄馬隊之所長用賊技之所慣四眼狗慣以築壘裹官軍之後路與餉路曾一夜而作壘數十座也料度賊情審量地勢臨陣機宜變幻不窮惟禮堂兄實爲將帥之雄中心欽企不可言狀此時必望大力主持并請以

函告滌帥速卽分撥重兵也應商事宜條列於後
請唐道一軍卽行移駐石碑城中以便將禮堂兄所
部各營調歸禮堂兄本系都護之親兵呼應較靈勇
敢尤著必成大功一請滌帥撥七千人駐太湖之西
北以固楚疆滌帥麾下多樸實之才無浮囂之氣惟
乞二日三日內卽行移營則吳楚之民感且不朽乞
禮堂兄義渠兄加函敦請以全大局一請禮堂兄以
所部馬步弁春靈弟全營均遵 旨歸禮堂兄調
度前往潛山地界并力以遏援賊一請之純入營由
小池驛高橫嶺入天堂或由辛家衝柳家畝入天堂

以遏大股山賊山中有重兵督會余參將六營丁訓導三營則舒桐潛霍之賊皆如凍蟲如檻獸蟄伏而不得逞山中採辦萬人之食冬令尙無匱乏也如山賊匪盡退之純兄尙可應援山外一請舒都護速駐大坂河林翼同金守駐柳林河則英霍之氣皆通而吳曾七營不致孤懸聲援可接一禮堂兄步軍已咨請加給口糧以歸畫一并行糧臺矣以上各條如蒙俯鑒愚誠則屠狗可成大勳可卜但此計須決斷號令須畫一此計不可過四五日不決過四五日不決則後悔無及矣寶慶之被圍三河之失險可爲寒

心應請公同函請滌帥速賜決斷至臨陣機宜禮堂
兄所能獨斷各營將士恪遵調遣斷無貽誤也

復李申甫榕祠部十七日

得書敬悉軍事不了恐爲三河之覆敗爲寶慶之被
圍日夜苦思呻吟不已十七日三更定計奮然興起
坐以待旦以地勢賊情而論已拊其背而扼其吭官
渡摧袁虎牢擒寶至計深機亦不過如是若遲滯不
決則步軍必被圍困希庵母病或難絕裾以行馬隊
攻壘非所長求野戰不得其禍敗仍累及滌丈彌縫
補救耳七千人之請九頓首而出志在赴急難以興

楚耳城疑關東面是縱賊不知賊所恃者城官軍之所困者株守之城賊縱之使戰可勝也若待援賊外圍城賊兩翼是官軍有內外夾攻之病其敗無疑或又疑太湖功棄垂成不知得空城不如破賊去冬曾得太潛舒桐褒棄之如遺則得城不如破賊之功不待再計而決矣况破援賊則可連下五六城而太湖仍在吾掌握之中且以地勢論扼潛山之山外與天堂之山內則援賊絕跡萬不能過潛山一步亦不能從天堂山僻繞至太湖

此中二百餘里以天堂爲要

太湖仍釜中

游魂耳舍大圍不謀而小圍是好智者不爲也如此

布置且定限三四日成軍而出則大功必成賊首頗
知兵不南走桐城歸安慶卽北走英霍趨商固羅麻
然禍猶稍紓緩也至多公之爲人其臨陣料賊明決
如神驍果冠倫實有可憑臨大事之時卽楊素鄧羌
猶當委曲以成人之美若不假以事權則事終決裂
事後銷除一紙文書耳嶰虛止滌丈太湖之師是小
人儒之識非所望於吳楚東南之大局也弟敬滌丈
生於至性此事必得請而後已且不能適二日公與
少荃雨亭公求之當必憐此包胥也帥府應在宿松
城中修城池設門禁資守禦不可輕出太湖千言萬

語責成我公與少荃雨亭也公與彭公統兵七千駐太湖西北隅萬全無失不輕出隊出則齊全勝亦不遠追仍一面請元公飛舸趕來林翼初不料元公之速去林翼駭懼自危仍以婉求來鄂爲是滌帥派七千人出師弟卽改駐英山柳林河英霍一帶也

致曾滌帥 十七日

七千人之請九頓首而出丈必憐此包胥也得潛山山內之天堂與潛山山外附近之要道實拊援賊之背而扼其吭

除卻潛山城外十五里驛路與天堂山內一路卽十萬賊來無隙可入太湖地

界此二枝兵可管三五百里之要非扼其吭而何天堂得手賊如上趨則以萬人出龍井關搗青草壩之

虛非捫其官渡摧袁虎牢擒寶智計亦不過如是而

太湖內數百里無隙可乘舍小圍而謀大圍也幸採
納決行且所言不得過今日今日已三請矣明日仍
如此法行賊首當趨英霍一路舒公與林翼尙有步
兵八千人合金會吳及撫標三營以張家塆在內地
不須兵也賊不至太湖不得過潛山不得過天堂則
千穩萬當馬兵千人或尙不致決裂再俟劉英山沈
思審處丈如疑林翼之謀爲非則大湖步兵必被圍
馬隊於攻壘攻城非所宜以漸而致困一二戰不勝
彼之衝突是所長矣將有自顧其身不顧大局之一

日仍以大禍貽丈補救彼時乃倍艱難耳如賊勢大股全趨英霍之純在天堂尙可援我湘軍是一氣卽改撥二三營交幹臣與逸亭均投機也唐義渠不宜株守石牌只可畱七營爲守禦而仍挑四營歸多以援賊多一營卽備多一路打援賊則兵愈多而愈妙也總之破援賊則可得五六城爲援賊所圍非三河之失卽寶慶之窘得太湖仍當棄之况未得耶求丈鈞度決計丈帥府宜在宿松城中萬不可移

致曾滌帥 十九日

十七日林翼之議如有不是尙乞鈞定林翼聞之希

庵屢言及七年八年各路之戰事蓋狗賊之善圍官軍是其長技鮑春霆七年血戰意生寺六營一統將僅餘一二人尙在其餘非捐軀卽成廢世間忠勇固推第一然待其壘成以圖之實大喫虧之事故林翼之愚總思以打援賊爲先著不欲使其內外受敵也應商事宜今日仍專函往商蔣唐鮑多條陳於後尙求鈞酌一唐義渠不願駐石牌以替代多之四營且言如必欲派往須帶全軍應如何準行之處林翼亦不敢執成見一鮑春霆六成擊援賊四成守舊壘亦可行但六成擊援賊更須他軍大力相維否則單弱

乞鈞定一之純不入天堂亦可天堂尙未十分告急
余丁九營亦尙可恃英霍商固如不萬分緊迫苟可
以金逸亭支持亦決不紛紛徵調也一宿松各營只
苦無統耳兵將則均樸實卽他處強兵亦不過如此
仍乞鈞見再酌能撥數千人則抽去之純春霆之六
成打援賊更穩矣一禮堂之深處丈諭至精默而存
之爲是唐鮑於打援賊後均可獨當一面另有所思
西蜀淮北兩處也之純則亦不可羈一事權之意虛且暫局
也專責成之意實否則馬隊不救步兵畢竟是步兵
苦耳丈旨林翼萬不敢違然此事竟未能恪遵不失

中有苦心也總之打援賊必須精兵萬人馬兵千人似須於城外稍遠以免內外夾攻之苦四五日定計則一成不變矣林翼性躁愧甚然躁於先尙可彌縫萬一到六日後卽當靜默不言矣

致曾滌帥 二十日

得賜示以十七日所議不甚妥洽十九日又一件計復諭已在途蔣多仍主前十七日說鮑亦有二十五日拔營新倉之說均復十七日之議而十九日之議明日必到到時再以尊意六成禦援賊四成遏城賊蔣赴天堂多爲游擊之議再行奉商林翼私計亦難

固執惟以遠遯則不穩內外受敵又不穩鯁鯁過計
殊無把握如潛山之王家牌樓高橫嶺羅溪河一帶
爲援賊捷徑則陳德園亦於太湖後路微有關繫英
霍一帶異日亦必有警動舍陳德園不顧則恐此心
之非舍英霍不顧則與奏定章程不合此事尙乞鈞
示裁決賜復遵行至蔣赴天堂在內則有天堂之余
丁九營在外則高橫嶺亦恐四千孤軍不能獨支耳
尙乞鈞奪總求抽重兵以制援賊而附城逼近城根
之壘不爲城賊所襲乃爲上計至一靜一動或遠或
近林翼本無固見亦無把握也統求鈞裁指示四將

此三四日尙可細商過此當靜以俟之忍以持之耳

致鮑春霆總鎮 二十日

連得來書均是復十七日兄所條議之信弟有二十
五日拔營新倉之議二十日兄處得滌帥十九日一
函是復兄十七日之信以兄前說爲不妥洽仍須熟
商一滌帥言以之純入天堂天堂現有余丁四千五
百人天堂之外則高橫嶺水吼嶺王家牌樓均賊所
必爭若僅以蔣軍四千人獨行亦恐尙單也一滌帥
言以弟與義渠兄仍紮太湖以六成禦援賊以四成
禦城賊四成畱壘中不致爲城賊所襲否一弟言二

十五日拔營往新倉是否應如此舉行候滌帥酌示
一滌帥之意恐襲遠則拔營爲難安營爲難米糧軍
火轉運爲難一動不如一靜剿遠不如剿近此滌帥
之穩計也兄之愚見亦以遠剿則恐兵分力單逼城
又恐腹背受敵鰓鰓過計不過如此至兄處函商本
無固執之見亦非遙制之心只求力破援賊耳只求
不爲城賊所襲不爲援賊所包耳小包暫包
尙易打破兄只以
函商不用公牘恐兄執著一見以札施行則百里之
外難於揣度或有貽誤也三四日後則并函商亦不
必只有戮力同心四字爲囑耳仍望與之純義渠禮

堂兄商定往返文書恐亂人意兄不爲也

致多鮑唐蔣四帥 二十日

狗逆上犯援賊既多城賊亦狡焉思逞我軍內外兼顧似不免牽綴之虞鄙意欲於太湖城外或官軍營外修濬長濠爲少省兵力之計如六年圍攻武昌時賴長濠得勁城賊不敢輕出遂能注重魯家巷援賊挫其兇鋒鄂城亦以徐下成效既著前事可師敬請閣下相度地勢與各營熟商妥辦如可日內濬成則城賊一面之防僅守長濠較爲易易卽太城得手亦足以遏其竄逸而盡數殲之是否可行卽乞卓裁速

籌示覆

致河南巡撫英蘭坡

二十日

頃聞懷遠一股出撲壽州六安一帶兵勇全數撤往
援應而狗逆以十萬之眾蜂擁上犯其前隊陸續已
到桐舒天堂之余丁各營業已迎擊疊據搜獲偽報
並賊探供稱以太湖圍急注意上援并勾結捻匪窺
伺商固兵分而單鄂力殊難支展軍情瞬息千變未
便紛紛抽撥致存瞻顧之思閣下展策籌邊勦華在
望如能飭道張守以三四千人守定固始即可互
爲犄角或新練尙嫌單薄但得穩守城垣臨時策應

亦爲較易兵機難測固始爲賊所注重尙乞卓裁斟酌先發制人而固圉之謀卽爲庇鄰之舉惟高明垂察焉

致多鮑唐蔣四帥 二十一日

二十一日得禮堂兄二十日來函并春霆弟二十日復函具悉一切應商事宜條列於後一天堂九營現無告警之信該九營本尙可恃且地勢亦險要可守如有警信候臨時再行函報此時之純一軍不必入天堂以仍紮太湖爲定計以防城賊而備剿援賊一義渠兄一軍若全營移駐石牌誠如禮堂兄所言以

有用之兵未免置之閒散應仍紮太湖以防城賊而
勦援賊一春霆弟來函二十五日拔營新倉查霆營
駐紮東面城賊乃困應否移駐新倉抑或遵滌帥前
函之意仍紮太湖應行應止或動或靜應請春霆弟
同禮堂兄從長計議弟不遙制惟求禮堂兄春霆弟
計出萬全乃爲善策總之天堂九營目下並無告急
之文而滌帥奏定第一路現駐宿松必難分兵前來
太湖是太湖之城圍未可卽解惟有就近防城賊俟
援賊已至就近抽各營精兵痛勦此時不必紛紛調
撥徒勞兵力且尙不知賊勢專向何路禮堂來信言

及各軍不可過分亦不必速集免致臨時分調難於
得為殊切有要此後一切機宜均請禮堂兄審量賊
情隨時酌奪隨處策應弟是奏明專管第三路英霍
之事太湖機宜惟靠禮堂兄商同諸位一力肩承相
度布置弟相隔百里且必須馳往英羅邊界斷不能
遙度太湖軍事也

再者弟於發信後卽專意料理英霍一路兼顧商固
一路卽不再以煩言奉瀆矣太湖之事一意奉懇只
求力破援賊吳楚幸甚天下幸甚

再者滌帥必不撥七千人圍太湖則現在圍兵均屬

難撤誠恐我兵一撤不但太湖城賊薪米俱便且恐其出入自由是弟前議均無用處殊深焦灼

致曾滌帥二十四日

來示敬悉今日得霍山報壽州無恙賊盡西竄似應拔營駐英霍之交以金舒六七日均可齊到英山也春霆蒙先添五百人甚好林翼曾面許異日添足五千人矣春霆之英驚何減迪庵迪庵之得士心過於春霆迪庵失地勢五千人皆廢至意生寺之事一戰而去二營官亦可一不可再之事春霆所處地勢可以四面受敵凡軍事顧一面則弱者可守顧二面強

者可戰顧三面强者僅可守顧四面則强者亦難守
秦王迎擊於虎牢非待其逼城下而始戰也大抵四
面受敵之境卽能戰勝於一時而亦不能受更番迭
戰之擾陳玉成未必一戰卽卻也此閒不憂唐蔣之
軍而深慮春霆愛春霆也春霆似孟施舍詢以軍事
斷不告饒加以激厲轉成憤氣宜委曲而暗中保全
此意不能宣布於人唐之所處萬全無失膽旣遜人
識亦微瑣蔣之所處亦尙可全如援賊不至幸甚如
援賊之至不逼太湖亦尙無慮設眞從此路而來則
必先全春霆一軍乃能得手矣

復彭雪琴方伯

受降之舉責以後效復示以機宜使之守定殷家匯而謀青陽銅陵兩處辦法最爲妥善深以爲慰建賊分股出城乘勢取之亦自易於得手適據普欽堂來函亦有出勦建德之說而苦無行糧兄已代函江撫而囑以相機進攻矣狗逆有信上犯太湖城賊聞大援將至公然出城挑戰天堂之余丁各營昨復迎擊桐舒賊股於溇水一帶兵分而單深以爲念又賊撲壽州六安一帶兵勇全數撤去英霍商固境地防不勝防兄擬於日內移駐英羅地界矣

致多都護 二十七日

得來函指畫詳明傾吐肝膽足見胸有成竹目無全牛弟旣以軍務重大奉託閣下斷不掣肘亦萬無改移弟負罪出山所欲破者賊耳當卽照來示飭行仍懇閣下速卽以上策一條迅速商定卽刻咨移疑事無成能謀尤貴能斷至英霍一路商固一路勢必有賊分擾弟當於初一日拔營前往照應一切儻非萬不得已弟必不致紛紛調援也仁兄來函以鮑唐圍太湖寬爲布置四面合圍綽有餘力抽出蔣之純於潛山黃泥鋪紫營貴營卽在黃泥鋪迤東五里之野

雞灣駐紮以貴營馬隊策應兩處兼照管石碑不獨
石碑能守并能制水吼嶺之賊不敢窺伺天堂其犯
天堂者僅舒城主簿圍桐城之龍井關一路天堂九
營尙不難於勦辦此爲上策第一面函知鮑鎮唐蔣
二道外卽請如所策咨移辦理可以操必勝之權總
之緊圍大湖不使賊出攻拔潛山或駐潛山附近穩
紮穩打靜待援賊奮力迎勦不使賊入均是要緊之
著弟決無異議切函致之諸將亦必遵辦矣如可定
計卽請尊處通知決策施行弟處斷不掣絲毫之肘
其太湖如何圍法亦請指示唐鮑二軍切囑切懇英

霍商固弟之責成甚專唐鮑二軍能制太湖之城賊
不出則龍灣一路蘄州之陳德國一路均無虞矣

致官揆帥 二十九日

得手函敬承一切太湖軍事議論多而成功少極意
求全當不致誤事儻援賊不至圍城固可靜待其飢
潰如援賊果至則亦惟有弛一角而并力打援賊之
一法援賊破則城自下且又不止太湖一城矣天堂
一軍扼潛山桐城舒城霍山四縣之要二十一日又
遣勦槎水而捷然究嫌力單又已深入重地尙須隨
時補救弟任英霍商固而近日所謀尙在太湖非好

事也太湖不得則各路不能進兵湘軍九營業已移紮英山柳林河弟亦擬移營英山羅田之交以顧第三第四路尙待太湖各軍議定乃可行也舒六兄馬隊千名料理齊全可壯三路四路之軍威新兵雖未慣戰然有步軍相依尙爲可靠富慶阿歸禮堂或易駕馭押馬兵到尙可得百三十餘員名歸弟處仍是歸舒六兄打破援賊後以三四百看家亦妙壽州賊已退廬州賊欲上犯然均是游魂未定耳靜以待之或可有濟淮北撥兵一節現在淮北不警或俟一月後另行籌撥思量再四惟唐義渠可撥而彼心甚畏

遠行也

致莊蕙生方伯

二十九日

金逸亭一軍已移英山柳林河英霍商固不可空虛
若偏重一隅必貽後患弟之暫行移駐陳德固爲大
湖代謀耳太湖之事援賊不至主圍而使之飢潰援
賊若至以二軍扼楚疆之西北以二軍專打援賊雖
近於弛圍而所保全者必大成功必美此定計也軍
事忌二三尤忌牽綴以萬人圍城只算三成是一萬
人只有三千人之用此理至精切非經過敗仗者不
能道及此情也兄聞之可爲第一樂十年軍事無人

能運掉靈捷者只苦頓兵堅城耳李左車之教淮陰
是也希庵已六旬催之親見其母輾轉牀褥必欲其
絕裾遠行恐非人情况我鮮民何忍強迫近日必有
復書前來如實不可強自以勉強支撐曲體人情爲
是公意以爲何如弟強之使來恐希庵異日有終身
之怨弟準其侍親恐弟等兵事不了而妄自擔荷異
日又爲吳楚士民之怨弟殊難自處矣浙江月餉一
片揆帥已允奏聞否秦晉蜀三省萬不可恃以心不
在鄂故也澹村先生由鄂入浙深知鄂力艱難當不
以空言搪塞丹初本領本大志節亦堅凝所請六君

子當以丹初爲第一才樊案易了甚慰當以顧大局
扶善人申正氣爲主公曾受滌帥之知愛人以德毋
使楚南士民以此致怨於滌帥卽是愛敬之至理感
甚感甚

致鮑唐蔣三帥

狗逆上犯遲速無定期而可決其必至禮堂兄與之
純兄專任迎勦春霆弟獨駐東路內外均當賊衝應
移駐北門歸上年所駐舊壘義渠兄應移駐西門以
補蔣軍之缺庶幾聲勢聯絡可以全師卽可以扼楚
境門戶第臨事爲此不免倉皇而先行弛圍亦慮以

長賊志必須確探狗來消息相時而動不先不後適合機宜使城賊不得早遲而援賊大至亦有以并力勦除斯無瞻顧牽綴之虞耳

復唐義渠觀察 三十日

得手書擬將訓營撥二三營於西門駐紮其靈營俟蔣軍移去卽紮蔣軍北門舊壘大約北門與小西門靈營專之南門與大西門訓營任之等語如此辦理卽令援賊果至靈營不致孤軍隔於河外是以二軍專守太湖顧楚疆以二軍專打援賊也事屬可行可以無損惟移營之遲早應待多都護探實援賊之真

偽且候其酌定緩急也此議定決弟以後亦不煩瑣
惟望靜審機宜以待賊耳

致錢萍石星使 三十日

頃奉賜書事機明決虜在目中馬文淵隴蜀之規趙
壯侯金城之策無以踰此滌帥以中朝不準餉不準
蕭張奏言兵力僅可強自支撐可守不可戰請兵一
節往復十函終不可得然亦尙有他法可施應以援
賊之遲速定分合之緩急如援賊果至以多與蔣專
勦援賊以鮑與唐專顧太湖西北以固楚疆跡似暫
弛東面而援賊果破太湖及附近各城均爲我有又

何嫌何疑憚而不爲耶此時尙在靜中密札繕就俟賊情畢露決計施行屠狗之功不可知而覆車之患必可免矣英霍商固情形賊情游魂未定弟雖分九營入天堂分八營助太湖然使專一而不一三注重戰事不聽皖省州縣紛紛請兵則事不牽綴尙可力戰也金逸亭九營弟尙賸三營加以吳曾七營尙可九千人舒公馬隊千名雖未慣戰然弟之用馬隊尙以出隊後遣弁告之緩步而來則馬隊在後賊無包抄之技俟賊鋒已挫賊陣已亂乃縱馬隊乘之故馬兵用力少而成功大斷無敗理特馬兵用之商固舒

廬則有力用之英霍則無力耳林翼駐營是英山地
界兵已至而將不前哀此皖民延望終虛然速進亦
實不穩此又林翼等無可如何之苦境也鄙人何知
兵略昔年不應招納楚人結爲營伍私計欲自了皖
難則鄂疆稍安非如八斗才之大言不慚欲以川粵
自任者也江南大軍五萬人以圍城而誤皖北皖南
之全局周天培李若珠之挫乃牽綴而致敗耳石逆
以二十萬人圍寶慶七十日遇希庵兵不滿萬一敗
塗地則圍城爲危機攻城爲非計可反觀而知其竅
矣兵事或六千七千人而大勝或一萬二萬人而不

勝此理難言

致曾滌帥 十二月初三日

初一日匆匆奉復大概情形林翼連日反復思議謹將愚慮所及者開列於右援賊未至且仍舊章不動不變卽小有罅漏亦尙無妨若派隊接糧則洪山石嘴相沿已兩年矣或尙無礙援賊果至以訓營霆營專守西北隅并力以固楚疆以多禮堂蔣之純專辦援賊此爲定計不必更易蔣之營伍固湘軍之尤精者八營獨自支撐尙可稍稍自立況益以突騎一千二百耶蔣公本與多公相合前此指派訓霆各營終

日紛紛迄無定局近日多公專指蔣軍不及訓霆則蔣公必無異說蔣公入營俟果有賊至先二日歸并多處亦不過石牌新倉一路卽遵來諭不必先圖潛山來諭索性大弛一節恐各營不從霆營尤難應命太湖四軍不必兼顧天堂應如尊諭當謹守不失霆營俟有援賊大至先二日移蔣之舊壘不致腹背受敵則霆營可保全此時亦仍不動圍城之難和向以六萬人而七年不見功禍且遍及各省石逆以十餘萬人七十日之久而爲湘軍所破蓋面向堅城志有所伺則不能顧其後與其旁情見勢絀無一而可此

李左車所以教戒淮陰也然非援賊的實上犯亦不
必弛園季公二十四日來書濬川已到湘潭催令速
來濬川到則策應第二路必能大捷目下機宜林翼
均是鰓鰓過計只在援賊果至之後必求運掉靈活
注重援賊正煩鈞慮耳援賊之頭目不授首則半年
一小警一年一大警吳不得安楚亦不得安翁祖庚
及霍山令羽書請兵到霍山兵到霍山舒城必震天
堂亦穩且皖民延頸西望林翼甚愧於心而速進則
嫌不甚妥請酌示機宜湘軍無將若待希庵非一年
半年不可期必只可以金代領之而助以事文與吳

廷華何如此閒之事似是一氣曾卓如兩次奏報請
鄂兵千人湘兵二千人如因敘州土匪則可不必若
石逆由荔波竄蜀道則非水陸二萬餘人不能救也
三千人只可嘗賊無實濟於蜀林翼定計初六日移
營英山與金曾吳合辦一事以守前議

致官揆帥

初五日

太湖之事籌議已定援賊不至城可必得援賊果至
亦不誤事弟卽於初六日移營英羅之交安一老營
希庵來信痛哭流涕萬不忍舍其病母而卽日就道
其母年已七十四矣親見其病臥牀褥而繩襦以行

此豈人情可近之人惟一軍無領將弟若強希庵則
非情理自任兵事又恐誤事機其軍有金守吳縣丞
二人老成人也或可委任容林翼斟酌辦理倘金守
能任此事則甚妥當韋志俊投誠獻出池州已由楊
厚莽先行賞給二品頂戴花翎其部下之黃文金等
由道反兵自相殘殺已被韋志俊殺退厚莽之意欲
俟再立大功方可入奏至口糧一節今冬尙可不必
代謀明春立功後如應籌給由湖北酌量賞給總之
討賊之策不可全恃招降兵強則降賊至又降賊須
陸續解散聞初降有萬餘人近已散去數千老弱并實心不擾百姓乃

可施恩請中堂以此意掣銜復奏大概此等事并非得意之筆且恐貽後患耳太湖克復諒不遠矣

致湘營金逸亭

初七日

得書具悉一切步軍萬人應由統帶自選則籌兵一層似可不虞其掣肘霍山之米自應由營採辦可發給米價萬金交營委員由六霍舒固始分採亦似不致空乏則兄所慮二端足以自便惟翁中丞迭函請兵到霍山一節近兩日則以舒城援至霍山六安等處飛稟望援弟意欲先撥撫標二營入城暫守蓋慮賊踞此城則異日進兵爲難也且聞城糧有五千石

亦棄之可惜惟弟營分撥殆盡且萬一有賊到犂山則閉城固守固可十日不疲然終無不發大隊援應之理亦無不速卽援應之情若他處不牽綴則萬人亦須直進矣此層應請速爲思議決其可否石頭嘴七營惟事公二營尙待斟酌餘均一氣撫標有無可挑隨兄酌之若以一軍從霍山入毛坦廠一軍馬隊從流波碰會於毛坦廠則松子關商固均無警矣

致多禮堂都護

初七日

初七日行至英山縣崇山鋪接到初五日來書敬想慷慨激昂忠義奮發之概令人心感第二路本是兄

等專政弟處不可掣肘亦斷不忍掣肘也兄意以備
援賊須先期布置弟卽當照示飭行兄意不望蕭軍
接應此志甚壯可密存於心不必宣布滌帥不分兵
太湖其奏明第一路或是石牌安慶樅陽廬江等處
弟聽候滌帥自行酌度瑣瑣奉瀆轉非美事弟明日
到英山卽備公牘咨行尊處凡太湖潛山桐城廬江
之事遲速遠近悉聽主裁弟處斷不牽綴游移也

復荊州府唐蔭雲

初七日

治水之法以疏洩爲上專事抑塞或慮勞而無功我
兄按轡周巡當能熟審地形水勢於監沔兩州縣積

年被淹之故可得其大概能否擇利而爲之願以見
示錢漕有增無減於軍國大計重有補苴牧令無欺
隱民情亦無損傷而勘災之能事畢矣新灘辦法痛
除州蠹非辣手懲創恐痼弊不除我兄能親往手掣
更美更妥

復荆宜施道栗仲遠

敘州股匪不難剿除新徵兵將第恐未能得力則養
難適以貽患耳遠探逆情隨時防護最爲要著川鹽
所及甚遠而釐金增減軍餉之贏絀攸關各處行商
亦可於各局關要照示軍情藉以廣招徠而通緩急

新灘辦法最以痛除州蠹爲先著然接辦不力則慮前蠹既走而後蠹復來歸州之牧與新灘同知暨辦理局員優加薪水重養其廉使得勵冰心而彰鐵面其并歸鹽務公費著爲款目當俟揆帥酌定準行葯局存硝磺礮解繳省局清查細數報銷妥協之至洋葯關稅既不拘定部章則偷漏之防必須設法查究此物質輕價重務乞諄囑局紳悉心籌辦因地制宜爲禱日來蜀事如何花布各莊當大有起色也

胡文忠公遺集卷六十八

長沙鄭敦謹

編輯

湘鄉曾國荃

致左季丈李仲雲

己未十二月初九日

芝房遺孤零丁可念鄂中莊蕙生方伯文友石廉訪
顧子山觀察張仲遠觀察厲伯符觀察五君子又助
百五十金皆仁人之粟也託公以前項置田乞賜查
收再爲擴充八九畝以足其衣食士類得飽食便可
自立惟乞盛德成全之又聞如冠九太守另寄百金
到否

致曾滌帥初十日

奉丈言以敝部及大部作堅扼之師多鮑希浚作游擊之師唐尙在可酌之列蔣終歸希一一如尊旨可尺寸不失林翼以英山爲老營暫無深入之勢惟皖楚之交萬山叢薄袤斜三四百餘里如英山霍山潛山皆山邑也霍山設城在山之盡處如及賊之未至而以兵臨其城下則凡潛山霍山英山羅田麻城蘄州蘄水之山險均爲我奪又不僅天堂一隅之爲可貴矣擬以十三日派吳廷華先至黑石渡十六日派金逸亭繼進十九日二十日舒輔廷之舊部馬隊四

百人從流波礮繼進均於霍山城外相地駐紮英山城距霍山城約二百七十里得此山險異日不致因孤城牽綴我兵而轉運之煩勞費加倍然興兵以爲民也使霍民輟耕太息十室九空不如勞師而使貧民稍資春耕所謂住與行勞費正等也商之諸君均欣然惟林翼撥牘二營不得不屈請事丈連營暫資鎮守舒公尙有待馬之兵亦暫畱此近日第三路情形大致如此此閒尙是一氣似不爲難金吳以萬人并力專精主勦不主守主合不主分斷無敗理可慰
蓋念

復鮑春霆鎮軍 十三日

軍情無定相一聽多都護主持則軍令一而眾志和其成功必易而又先之以偵探加之以詳慎賊雖多何患焉大約年內陳逆必不能速至盡力固因太湖之功可成也吾弟忠心義膽兄所素知乃戎行閱歷馴至於優容大度慎密小心學問進境亦如是之速喜可知也承示城圍周密連日以大礮轟擊之石走瓦飛賊無固志尤須嚴防遁脫必得鼠輩而盡磔之庶終歲攻苦勤勞藉以大快人意耳弟營係扼城賊去路切囑夜哨勇丁多方準備必以積薪舉火爲號

營中亦須多辦火光以爲接應并飛報多禮堂都護
俟天明時向前追殺爲要至於日間衝突猶易爲功
要在吾弟與蔣唐兩軍悉心籌備耳此間擬撥金守
與吳營入駐霍山計以扼盡皖邊山險數日即可進
發矣

復多禮堂都護 十六日

接來函據探狗逆現來桐城其舒廬巢縣等處逆匪
麇集前隊已到青草壩爲數甚眾不日卽到石牌等
因查陳逆如果全力上犯自以分兵於新倉迎剿爲
上策如僅止陳逆賊黨二隊冒稱陳逆自來希圖預

撤城圍則此中緩急機宜應請細心衡酌如果偵探
確切自應依仁兄前議以蔣之純入營會合貴營專
剿援賊以唐義渠鮑春霆二軍專顧太湖西北隅以
固楚疆其如何設法迎剿與力顧楚疆牽制太湖城
賊顧全大局之處皆賴碩畫主持探確賊情隨時指
示各軍協力妥辦仍請就近咨移各營遵照辦理并
將援賊實情函商滌帥以便互爲聲援弟已駐軍英
山城南相去二百餘里軍情瞬息不能遙揣亦復何
能遙制且賊駐舒桐則英霍六安皆警而天堂兵力
尙單均應由弟處隨時策應弟已撥湘軍入駐霍山

隨身營伍不敷分撥其太湖石牌兩路以仁兄大力肩此重任弟斷不致掣肘卽鮑唐蔣各營惟仁兄指揮是聽敬乞時惠好音爲禱

復曾滌帥十七日

奉手諭深以太湖調撥爲駭異林翼原議以多蔣備剿援賊以唐鮑專制城賊而固楚疆多君與蔣君十五日商定忽以霆營一併前往小池驛十六日得霆營信恐已無及矣至尊意欲留霍山各軍暫止不進查霍山各軍只可勉強兼顧天堂擬留金逸亭十二營暫駐柳林河俟天霽則進青田畝東界嶺等處距

天堂僅八十里距霍山城百里以外如天堂有警由青田畝派五六成隊打行仗仍以青田畝爲老營至曾吳七營聞已冒風雨前進黑石渡恐止之不及事丈尙待二十一二日始進事丈言七營至黑石渡正月杪會合不遲黑石渡雄據一面控制三面阻水負山萬全無害鄙意或不必強之使止致駭軍心多君此番調度閱春霆信亦是強使從令也惟如此舉動賊必變計不折而北趨必不久覓太湖各軍索

二路戰事稍鬆矣至二郎河陳德圍似尙無慮
兵力天堂所分是侵第二路之界限蔣之

八營亦是第三路第四路之兵而改入第二路者也
然天堂後路仍必兼顧尊處尙待蕭軍蕭軍一年來
每苦行役太勞赴難甚勇而又不能應機中節大湖
西北尙乞鈞度救全風雪荒寒我不得進賊亦不得
進也尙乞寬釋自衛介唐之得士民心亦近年所獨
見也潛士到營長跪不起痛哭不止林翼不得已允
其暫留五月介唐之居爲天堂介唐之遇如地獄非
介唐之利而爲此也此等事只看有利心無利心林
翼非小人之恥爲小人一軍深入不得不徇十萬生
靈之請而強作五月之留且余軍何可孤懸恐前勞

付之流水而又貽後日之深憂也

致官揆帥 十七日

奉手諭敬承一切應復事宜條列於後一蕭軍未到而多禮堂急不能待已調鮑蔣移小池驛多公驍果戰將之才非統將之才然目下我軍無所統一不得不俯從之弟於軍事總是委曲求全之心也一多公欲添一千二千人弟擬大局稍定撥趙李楊朱李五營歸多而添人則不僅無將亦且無餉一多公是勝克齋一流人物似較克齋爲勇亦是可取一光固一路本擬以馬隊千人并撥步兵由六安流波礮進發

與豫州所求

廷旨所論正合請尊處卽行復奏

一瑛蘭坡如官稍助湖北之餉月二萬兩

少或萬五千兩

必以四千步兵一千馬隊由六安捍蔽豫境特林翼
不便明言耳尊處可否函商酌之一韋志俊尙有六
七千人欲歸命於楊軍門須給月餉雪琴已另稟上
聞乞酌示復奏大概請尊處酌辦一滌帥慮陳德圍
二郎河則未免太過弟之復信頗詳錄請酌示一天
堂尙可救援大局當不致有礙縷縷奉請鈞安

復多都護 十八日

援賊已至桐城計分三路進犯石牌新倉太湖城圍

尤爲腹背受敵仁兄籌全大局弛圍迎勦各軍頗無
違言想見

主持機宜獨斷林翼前照兄臺原議
以鮑唐守太兼顧城援以蔣營輔麾下專事迎擊
亦無非內保外禦狂寇之意適得鮑春霆蔣之
純兩兄書知仁兄近日調度軍事專以唐道一軍移
紮太城西北兵力似嫌單薄仁兄必能顧全大局四
路策應當不使各營稍有疏失也爲大將之道以有
救火固大局爲主不宜炫耀已之長處尤不宜指摘
人短處讀來書有前則厝火積薪絕無疑慮今則臨
渴掘井未免張皇之語查鮑鎮唐蔣道均非張皇人

詞義微嫌輕薄諒是記室措詞之失固知仁兄之必
不存此心矣鮑唐蔣卽有力弱兵單之處惟望一力
一心大家維持兵力有多寡賊情有緩急與夫各營
調劑戮力同心皆仁兄智計所優裕自不至稍有疏
虞來示過涉焦思用心良苦風雪荒寒尙冀從容佈
置也

致余會亭參戎 十九日

刻下援賊約數萬人由桐潛上犯太湖多鮑蔣已移
營於小池驛賊若由正路不得逞則必折而入山天
堂前面必警尊處務須每日一報軍情兄必不至以

所報紛紛調動如賊勢注重天堂兄於十日半月之內必以大力維持保全刻下柳林河一軍按兵不動此卽林翼深意特不可紛紛零星調撥耳此意密告於弟弟可密存於心不必宣言儻賊入天堂卽令萬分危緊亦須穩住半月軍火米糧先期妥固密爲檢點弟只穩紮穩打固守爲要

致金逸亭 十九日

昨日公函敬悉已商之事恆矣弟於滌帥敬之甚至故一切委曲求全唐七營蔣四營暫畱太湖多與鮑與蔣四營已到小池驛新倉黃泥港矣賊必從山內犯天堂尊處可囑余會亭每日一報軍情至尊營必

須三營到後再行相機愈遲愈妙愈老愈堅舒公舊
馬隊四百弟亦囑其候信再行拔營蓋軍事有以先
一著而勝者如險要之地先發一軍踞之此必勝之
道也有最後一著而勝者待賊有變計乃起而應之
此必勝之道也至於探報路徑則須先期妥實辦理

致余參戎 二十一日

得函敬悉所探賊情此番陳四眼狗尙未自來卽來
亦尙能制之弟已撥馬步三四千人先進霍山之黑
石渡以援寶慶之十二營由柳林河進東界嶺青田
畝等處二十四日二十五日分起拔營到彼小駐距

天堂不過八十餘里聲勢已振矣弟意金逸亭十二營與吳幹臣五營已到黑石渡終須出霍舒之間已札調松子關三營續進五柯楓等處約二十六七日可到英山初旬可到防弟與介唐月臺兄萬全無憂其如何防勦機宜可穩謀深算左宜右有矣惟年盡歲寒青田畝一帶恐一時缺少米糧卽請鈔此函寄之介唐速派正紳前往青田畝東界嶺迎會金逸亭以便糧食無缺其價例由營發斷無短少也切懇切懇

致潛山縣葉介唐

二十一日

弟以余君一軍敢於深入不忍棄之又見潛山士民

榮榮可憐一片愚忱欲救人水火而不自知其罪戾之不可救且又牽率仁人君子忍情數月殊爲慚愧刻下因懸心天堂仍以應進黑石渡之十二營於二十四二十五兩日由柳林河取道東界嶺青田畝等處酌量駐紮小住旬日再進霍舒之交又思金逸亭觀察一軍爲湘軍之最强者本年破寶慶二十萬賊卽此十餘營之力久處天堂恐無用武之地弟仍另調松子關三營來五柯楓爲助二十六七日乃可到英山也至舒城霍山之令恐不得士民心力修卡之事弟不能札及天下事惟有良心人乃可使苟非其

人不如靜而不動且金吳兩軍均指舒霍之交似亦
不須急謀此事潛太總可克復弟意必續謀舒桐弟
擬仿兩靳礪堡之法使天堂數百里山險永無賊匪
闖入之勢此潛人百世之利也非好官正紳同力向
心亦恐不濟藉地利以衛民藉民力而使之自衛實
是省錢省力之法假如山險可守當用千人者不過
百三四十人即可使賊匪望而卻步弟所謂百世之
利者此耳

復皖撫翁祖庚 二十一日

鑪橋瓦埠之捷軍威大振而又以堅壁清野使不得

裹脅良民從此節節埽除層層展布皖民其再生矣
臨淮代將旌旆生新推袁之效亦大局之幸也會滌
帥宿松之軍已分入太湖以備圍剿兼顧楚疆而以
多都護鮑鎮蔣道各營分扼新倉石牌小池驛各路
爲迎剿援賊之計潛桐黨援日益天堂之余丁九營
深入腹地奇著亦險著尙須設法應援我軍趨重太
潛而英霍六安尤防該逆伺瑕而入林翼以臘入移
駐英山城南撥金守代領希庵舊部進駐霍六之閒
復以馬隊由流波磴一路相輔而行意欲扼盡皖邊
山險使該逆不得負嵎庶我師攻剿不至艱於進步

俟各路軍情稍定，狗來蹤跡既確，卽當以馬步大軍會剿。盧副將部曲弟所深知，弟曾保過一次，今悔之。

復浙撫羅澹村 二十二日

連奉賜書於浙中吏事、兵事、餉事悉數周詳，想見新政勤勞如治絲而理其緒，舉綱而提其綱，節節清釐，盡懷彌苦，大抵爲政在人，取人以身，公正人也。以正人而引正士，扶持正氣，何弊不可除？何利不可興？然誠篤之至，亦須出以精明果決也。司道得人，州縣之風規日謹，將領得人，則從新整頓，汰弱留強，亦可稍爲節省而資緩急。理財得人，則鹽榷商捐取山海之

富饒以供挹注無刻剝侵蝕而自畱其餘皆賴壯猷
石畫布置從容幸勿操之過急致損餐衛爲祝李次
青學識明敏任事有血誠近頗眷戀庭闈厭棄戎事
滌帥屢促出山而未肯應手想尊函招致亦必不肯
來也其人之長處甚多熱腸血性實爲第一其短處
則愛才如命疾惡如讐而所疾固多惡人所愛未必
才士也滌公刻下統將乏人蕭濬川以 廷旨二
次令追勦石逆遲遲其來現分軍入太湖不免鯁鯁
計慮桐潛援賊眾至已抽多都護鮑鎮蔣道三軍分
扼石牌新倉小池驛以備迎勦林翼於臘八移營英

山城南天堂之余丁九營深入腹地尙須設法撥援以補其勢希庵未到以金逸亭代領所部入駐舒霍之間與舒六兄馬隊相策應欲盡扼皖邊山險不使該逆負嵎布置稍定俟確探狗逆蹤跡并力剿除翁祖庚中丞尙在壽州袁午橋星使圍剿臨淮旌旆一新軍事似有起色韋目獻池城厚庵軍門責以立功自效而逆黨反戈爭殺城守不完進退維谷然歸順已誠仍擬招徠特未可不名一錢甚有難處蜀事小警軍政久廢辦賊無人曾卓如前輩初下督蜀之車請援未許夷情未定聞海防又將戒嚴亂之初塵大

局何日了也陳都司恐未可恃弟不知爲何如人已
出詢滌帥與雪琴方伯容當再佈大抵將士之稍佳
者弟與季公滌公求之甚至其流落江浙者恐非上
選矣

致曾滌帥 二十二日

連日得分兵喜報巨躍三百幕中之客無不欽感如
龍馬上山舞蹈歡喜今年林翼負疚在心然聞寶慶
之捷是一幸事聞宿松分兵又是一幸事細察賊氣
尙弱如果戮力一番可一鼓成擒也天堂已無後顧
之虞逸亭十一營二十四日啟行由天堂之背草山

而行擬駐於青田畝東界嶺等處距包家河不過三十里距天堂不過八十里如竟高興挾行帳以六成隊會同天堂九營從背打出未始非用兵之奇著也舒公馬隊二十五日從流波礮進發流波礮距黑石渡四十五里吳幹臣尙不單弱太湖鮑軍拔動後蔣駐其壘中以四營力禦城賊實屬可嘉林翼已放心千萬不怕矣林翼私心所對不過者事丈耳欲以陳德園捍蔽楚疆而松子關所調急切未到容另撥籌大勢則各路似屬穩妥非仁慈大德不至此富鄭公會言范六丈真聖人也吾亦云然蕭軍如必欲調入

皖中則須執奏堅請左公處林翼已函致之矣此番
潛太似有捷機所宜深籌者樅陽鎮廬江縣與舒桐
耳以局勢論非蕭軍并力則窒礙尙多乞丈酌之

致各帥

二十三日

迭閱春霆弟之純兄來函揣度賊勢或必由水吼嶺
高橫嶺內犯近數日賊匪未敢動作者蓋外怯小池
驛黃泥港之兵內怯柳林河朱武廟之兵也鄙意之
純兄尙畱四營在太湖之東面如不移動須義渠兄
添兵以助之如須移動則請移會小池等處與春霆
之營相犄角援應庶霆湘之力以合并而均厚此應

商者一也又閱葉令介唐及余會亭丁月台各函則
水吼嶺高橫嶺鐵鎖嶺尤爲緊急刻下舒公舊馬隊
二起及吳幹臣五營已進黑石渡則霍山已可無虞
金逸亭十一營二十四日循潛山之東界嶺青田畝
進兵應如何相機會剿或以兵代防天堂而以天堂
九營備剿或畱一二營守險而以六七成隊挾行帳
鍋釜會同天堂九營挾全勢全力進剿緩急之兵機
分合之兵勢應由逸亭主持其賊情之動靜多寡山
徑之夷險遠近則由介唐及會亭詳悉函商或待賊
之變症而後急起應之

賊有變症則賊情畢露即小有破綻而彼竭我盈彼肆我

敬亦必勝
之道也

或乘其游魂未定而先破之此閒遠隔三

百餘里不能遙制也如天堂各軍及潛山山內各軍
果有機宜亦可密會山外黃泥港小池驛作內外夾
攻之勢此應商者二也至潛太得手則蔣金均須并
力舒六之間而桐城樅陽廬江三處乃謀皖之要著
何枝應何路每路須若干人其集思廣益明以教我
此應預商者三也弟所思慮不必盡是亦不冒執持
已見惟屠狗之心滅賊之心則甚堅耳如有可採擇
之處惟兄酌之又兵事之妙古今以來莫妙於拊其
背衝其腰抄其尾從天堂出杜埠野人寨則自古用

兵之奇計一舉盡之矣惟須審明地勢賊勢并須地方官紳預先安排米糧引導路徑耳

致余參戎 二十三日

金逸亭觀察二十四日拔營近於天堂矣由天堂出兵以剿杜埠野人寨之賊則爲奇功或可與金逸亭觀察商之昌桂禮畱一營二營守老營餘均七成八成作爲一路湘營之到東界嶺者可以二營守險餘九營出七成隊自當一路此議須細商金觀察蓋從其後而拊其背抄其尾并知會小池驛之多鮑蔣三公則賊可盡屠也爲期須在正月未知何如總之天

營以無險失卽邊地守卡者小有破綻亦不足慮賊
不過三四
又半是擄掠威逼而來破之必也或
遲或速愈
愈精妙不宜草草

致多都護

二十三日

得書敬審二十一日賊匪來撲霆營兄之老謀按兵
不動甚是勝算惟弟心尙以霆營爲單薄如之純軍
可以合并一處則十萬賊亦可破況未必十萬耶至
太湖現有唐之七營滌帥十營其計已萬人矣合圍
固好小缺亦無妨以尊處旣扼其前滌丈又操其後
弟又有重兵以扼天堂是大圍非小圍也至天堂以

丙弟力尙能照應或者小池驛等處力戰之時弟尙可撥精兵從山丙抄出以拊其背抄其尾衝其腰亦未可知也

復多都護 二十四日

兄與春霆弟謀定而動師克在和取彼兇殘吾無慮矣蔣之純兄以二千之眾遏傾巢城賊之衝壯氣雄心可敬可慰至以四營扼守東面訓營尙難聯絡滌帥已以六千人由宿松前進當能布置周密可免疏虞蔣之純兄入營應否與春霆并力迎勦尙祈斟酌弟意尙嫌春霆稍單薄也如能續調之純四營會於

建營小池驛乃更妙矣承示賊意急救太湖天堂二
路必無賊竄亦尙難逆料鄙人已於天堂之內密爲
布置矣惟仁兄細審賊勢軍情設法兼顧前路相機
接應是所切禱

致金逸亭觀察余會亭參戎 二十五日

得株紫關手示敬悉一切所改行天堂道路較爲
直捷足見仁兄之志在滅賊各營大將之同心協力
也且感且敬惟軍事以審地勢審賊勢爲第一要義
卽如從天堂山內打出此卽地中鳴鼓角天上出將
軍也然必須通觀賊勢之輕重細察地勢之險夷乃

可得手葉介唐以救潛民爲重急切請援其士民來
營面見者或恐官軍之不前則隱約其詞而不肯明
白細說此地勢賊勢所宜細審者一也余會亭尙老
穩亦深知軍中艱苦丁月台勇往有餘軍事尙少閱
歷其所陳說亦須詳察此地勢賊勢所宜細審者二
也地靈港木子坳杜母殿金家大屋王家大屋走馬
坦撥蒿畝韓家坳三角坳七里衝等處地勢是否阻
水依山地圖不載我衝賊後本是上策但恐汊港之
紛歧或阻我軍之前山徑之叢薄或繞我軍之後非
深明兵略地形者前往看實未可深入此賊勢地勢

之宜細審者三也二十二日之戰蔣鮑尙無信來多
公所報傷亡副都統銜者四員且咨尾尙言勦辦殊
難得手是二十二日之戰并未十分妥善討賊之志
不以一眚而自撓而滅賊之功必須萬全而自立於
不敗之地此地勢賊勢之宜細審者四也至內外夾
擊之舉應於審察確切後再行密商多蔣鮑三君子
其時在明年正月初旬或元夜奪崑崙之前固不可
急尤不須急也再者如果地勢賊勢大可有爲則以
余會亭丁月台并松子關及英山營爲一路金觀察
爲一路以全力全勢會勦乃成大功酌之示之再者

如果地勢得宜固以并力剿除爲上策卻須一打便勝若頓兵潛山山外求戰不得而太湖之賊旣軼出於外潛山之賊又繞舒桐以窺他處我軍并重於一隅亦非兵法之善也此中緊要機宜兄可密審詳察致官揆帥 二十六日

廿五日奉廿二日手示敬承一切應復事宜敬陳於後二十一日安慶賊首往桐城迎狗狗到頗眞其鋒頗銳二十二日靈港之戰我軍亡四副都統銜者馬隊亦傷亡不少多之步軍亡三百餘人石牌在太湖之東南我軍旣得石牌不能不顧其移營前駐小池

驛乃必然之勢非中計也多於二十四日來信賊於
戰後卽分三分之一他出以弟料之必分趨天堂與
霍山矣蕭濬川已據駱中丞奏請由澈浦入蜀必不
來皖奏稿諒已咨呈冰案瑛蘭坡要楚兵殊不知希
庵未到希庵之意尙欲辭道員不要每年以半年養
親半年出外打仗鄂皖求之尙不知來否豫中之事
不必再望希庵兵由英霍而前已屬萬分支紮再飭
繞道蒙穎楚無此將或俟破援賊後再奏亦可姑飭
文案擬一稿再呈請鈞定

致多都護 二十六日

得來函備悉援賊猖獗非閣下大力維持血戰抵禦其禍將不可言公調換石牌各營整頓隊伍再圖大舉一節甚是勝算弟之愚見總須預先安排以待賊之求戰然後起而應之更是必勝之道蓋賊來求戰而官軍以靜制動以逸待勞以整御散必勝之道也此意固不可拘執而未必全無可採惟兄密爲酌之官軍鏖戰不能不有所損固不可因一眚而撓其心亦不可因大勝而有自驕輕賊之心蓋我輩卽打平江北亦只算家常茶飯并非奇事惟心念國事艱難皖民塗炭勉竭其愚以求有萬一之補救成敗利鈍

實關天命吾盡吾心而已至弟以昔年在鄂不願經
手招勇遂致母喪而不能在墓守制區區之愚以賊
不滅則吳不得安鄂不得安卽長沙與黑龍江亦不
得安非欲急功近名也兄是東三省第一名將奈何
因一時不能順手遂有他日息肩之意息肩不難總
須打滅此賊耳天堂一帶弟專任之兄欲撥兵添勇
弟早密爲安排異日必有好勇健將足供指揮亦必
聽調度惟急切尙在他處非可倉卒而至者請放心
弟必力圖此事以申兄平日滅賊之壯志也鄂餉已
竭應於此次擊退援賊後分別去畱仍以好兵勇歸

併兄處容弟從容籌畫若太急則弟力亦苦不及耳

致金逸亭 二十六日

二十二日之戰多與蔣均未甚利多與蔣稍挫卽怨人稍勝卽驕人此器量之淺也多咨來請馬隊弟顧第三路第四路僅舊馬隊三百餘名多處舊馬隊一千二百名且弟處馬隊已進霍山樂兒嶺勢無可分舒公在蘄水則西丹之未經戰陣者也萬不可倉卒誤用多咨來請步隊二三千人多處四千七百人蔣八營四千人鮑三千六百人合共萬餘人若再益二三千人是注重於一路而不顧其餘矣如謂力不能

抵禦應以萬人出奇計趨間道援之一擊之後仍當
收回則兵勢如生龍活虎兵機如魚躍鳶飛活潑潑
地此爲全勝之算但須審機審勢又臨陣之際須以
萬人并力有前有後有防抄襲之兵有按納不動以
應變之兵乃是勝著如派某人守後不應期而進便
是違令應期而不進便是怯戰此則必須大令嚴明
者也若徇他人之意以前爲美以後爲非必不妥矣

復多都護 二十七日

閩老兄營中有賊中僞職此輩首鼠兩端反復無定
賊敗則依官軍以自活官軍敗則又投入賊中平時

以賊情告之官軍亦以官軍情形告之賊匪俗所謂
兩頭蛇也須嚴防之免致漏洩近七八日且堅忍以
待大將以救大局爲主并以救他人爲主須有嘉善
而矜不能之氣度乃可包容一切春霆弟一營孤懸
仍望隨時救應林翼之愚覺得勝仗無可驕人敗仗
無可尤人卽他人不肯救我而我則必當救人願以
林翼之愚質之高明又打仗須整隊以防包抄得勝
則須戒兵勇搶物須戒窮追賊情地勢乞隨時示之

致金逸亭觀察

二十七日

夾擊原是上策欲破此賊非此計不行然須密計而

不可宜露須并力而不可單弱須謀定後戰相機而行而不可或先或後此時且請密商蔣鮑二軍看定地勢審定賊情然後約期舉行大約是正月初旬及中旬之事矣臨陣之時一切機宜弟不能遙制亦不可遙制以逸亭十一營及天堂余會亭六營并力一處弟恐兄處力單仍以巢梁及建威軍三營到三和鋪以備公調遣而畱丁到交戰時公防天堂之先二時分枝并勦此一策也以逸亭兄十一營獨勦一路或出高橫嶺或出牛肩嶺以余丁九營除畱二三營嚴守天堂要隘以六七營出水吼嶺此一策也總之

臨陣之時必須以二三營分布要隘以杜賊之包後抄尾斷不可一力前進致犯兵家之忌而啟狡賊之心此爲至要賊匪除卻分枝抄後并無他長此宜切切在意若打硬仗而軍心不亂賊力實遠不如官軍也又近日太湖賊困不僅宜防潛桐之賊包抄我後并宜於臨陣之時預防城賊計窮突出從山徑衝犯此雖鄙人之鯁鯁過計亦不可不留心防備恐不先不後恰遇城賊之奔軼也又天下兵事只此一理有圍城之人須先行另籌打仗之人此要著也有臨陣打仗之人須先安排後勁或預杜抄後之賊或備策

應之舉此亦要著也弟之續派三營來三和鋪亦卽此意

致金觀察 二十八日

鄙人之愚欲屠狗以賀新年非內外夾擊不爲功非正月初旬中旬亦不爲功然賊勢較石逆爲少賊計較石逆爲狡爲悍須一萬人并力同心則山中一軍乃可操縱自如山內地勢與出山之要徑細訪沈思乃能得其要領僅當一面會亭月台或同湘軍并作一路出山之後分枝或自畱二營守天堂老營而獨出要徑穩紮穩打尙須加以團練在後以助聲威以

作牆壘務期約會多蔣鮑三軍訂以初旬不雨不雪之吉日而又移駐距賊不甚遠之地安營其日出隊打仗不過十餘里二十里則兵不勞而賊可破也此賊破滅則吳安而楚亦安未出隊之前戒太勞戒太遠臨陣須防包尾防截後戰勝之後戒搶物戒散隊戒窮追此爲切囑不輕敵而慎思不怯敵而穩打斯得之矣其緩急分合機宜悉聽逸亭觀察與山外多蔣鮑密約弟不遙制鄙意總以并力爲主穩打爲主此是奇兵也奇兵而出之以穩尤奇之奇也

復多都護 二十八日

該逆詭計欲分股衝入太湖並分路牽制官軍使我師不便出隊惟仁兄設法布置相機截剿并隨時飛致義渠觀察豫備首尾迎擊以遏城賊援賊之衝此閒擬以山內廿餘營約會麾下暨鮑蔣之軍內外夾擊總以來正初五六七八九等日爲度因山徑崎嶇各軍行路艱難一時趕催不及卽近抵潛境亦須養銳一二日始能進兵仍須審定地勢賊情分路包抄并力一舉此事當密而又密不可宣露機宜如果賊入城中俟擊退援賊城中可不畱一賊也

致毛驥雲觀察

二十八日

前得金可亭書言陶君建威營操練已成亟思一戰
弟意此軍原爲中原起見北門鎖鑰非準不可實不
欲調入院中然思院中狗逆上犯現有大仗可打凡
兵之氣不見仗則弱常見仗則強久逸則終無用處
異日亦必不可臨敵欲調來與湘軍或昌營合同打
二三次大仗仍可撥回襄陽惟襄陽近日有警則請
止弗調如襄陽春令須兵或另調一枝換防皆隨兄
意酌定卽與陶君言之果可札調不妨代弟作札以
奉函諭爲辭仍由尊處查鄂軍行營章程酌給一月
口糧令其雇船到蘄水入英山會勦非此閒兵力不

足實厯練戎行咸全將士之意也條帥分兵六千人
入太湖與唐義渠專顧太湖城圍多鮑蔣三軍出勦
拔賊二十二日大捷於潛山之地靈港踏平賊壘十
三座斃賊六七千人尙須謀爲夾擊之舉冀得走狗
而烹之耳

致糧臺總局二十九日

軍士深入山中歲寒風雨崎嶇險阻二十九三十日
均行役不倦可飭吳覲臣以小車及水牌分道運錢
到英山以便多給錢文軍氣乃壯轉運萬山之中勞
費十倍然頓兵經年所費非三百餘萬乎費則事集

勞則功成況英霍舒桐異日小小捐助則運費亦猶可補也丹初美才正直而專心條理司農中第一把手畱營數月必能匡我不逮開仗行軍則軍火所省較多矣弟密計已定金公余公丁公均踴躍用命以二十營從山中閒道趨出此地中鳴鼓角天上出將軍也古今兵事以拊背扼吭爲至謀此殆近之矣可告之中堂星使爲荷

致余會亭丁月台

三十日

敕鮑打狗全在天堂萬人進兵似宜速宜并力宜畱兵守要隘以防包抄決勝之機宜明斷而保穩賊壘

是待戰而後填實其真賊多駐民房以殺賊爲事破
壘是第三第四小功也月台好大言言狗何日攻壘
自退狗能縱橫千里豈無狡謀希庵三次打狗其穩
處不可及多飽日前之挫非力不能戰兵不足戰得
意深入爲賊所包耳又太分則力單窮追則氣散大
勝而變成大挫非知兵者也不可不慎敬則勝整則
勝和則勝三勝之機決於此矣

胡文忠公遺集卷六十八

